



## Inuussutissarsiornermut Aatsitassanullu Ataatsimiititaliaq

### Ulloq 2. maj 2024 ilisimatitsilluni ataatsimiinnermut apequtitunut allakkatigut akissuteqaat

02-05-2024  
Suliap nr. 2023-13241

Najukkani aatsitassanut tunngasunik suliaqarnerit pillugit Inatsisartut inatsisaannut siunnersuutip (UPA24/25) suliarineqarneranut atatillugu Inuussutissarsiornermut Aatsitassanullu Ataatsimiititaliaq arlalinnik apequteqarpoq. Inussiarnersumik takuuk Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisup, Naaja H. Nathanielsenip, akissuteqaataa matuma kingulianiittoq.

Postboks 930  
3900 Nuuk  
Tlf. (+299) 34 68 00  
Fax (+299) 32 43 02  
E-mail: asn@nanoq.gl  
www.naalakkersuisut.gl

#### Apequt 1.

**Inatsisissatut siunnersuummi (§§ 6, imm. 2 aamma 13, imm. 1-imi) allaqqasut: "Aatsitassat qinngornernik ulorianartunik akullit" pillugit ersarissaasoqartariaqarneranut isumaliutit. Tamatumani killigitinneqartoq 100 ppm-imiitinneqarnera qanoq atuuttusaaersooq paaserusunneqarpoq.**

#### Akissut:

Taaguut "aatsitassat qinngornernik ulorianartunik akullit" taaguutaavoq aamma aatsitassanut ikummatissanullu inatsimmi atorineqartoq. Uraninut inatsimmi aamma aatsitassarsiorluni misissuinissamat atugassarititaasuni nalinginnaasuni taaguut "pinngoqqaatit qinngornernik ulorianartunik akullit" atorineqarpoq.

Ilumoorpoq aatsitassanik qinngornernik ulorianartunik akulinnik piiaanissap inerteqqutigineqarnerata allannortikkumanagu nassuiarneqarnera, piiasoqanngilluinnarsinnaanerani kinguneqarsinnaasoq, kisianni oqaaseq suliaqarnermi taamatut nassuiarneqarneq ajorpoq, tassami aatsitassarsiorluni misissuinissaq aamma ajornartussanngussamat.

"Aatsitassat qinngornernik ulorianartunik akullit" pillugit ilaatitsinnginneq imatut paasineqassaaq, inuit akuersissummik peqanngitsut aamma najukkani aatsitassanut tunngasunik suliaqarnissamat kisermaassisussaatitaluni akuersissut malillugu pisinnaatitsissummik pigisaqartut (annikitsumik aatsitassarsiorlunissamat akuersissutit), aatsitassanik qinngornernik ulorianartunik akulinnik, inatsimmi allami piiarneqarnissaat inerteqqutaasunik, piiaaqqusaanngitsut. Tassa imaappoq urani allallu aatsitassat qinngornernik ulorianartunik akullit uranimut inatsit naapertorlugu inerteqqutigineqartut.

Taamaallutik inuit akuersissummik peqanngitsut aamma annikitsumik aatsitassarsiorlunissamat akuersissut malillugu pisinnaatitsissummik pigisaqartut

aatsitassanik 100 ppm sinnerlugu annertussusilimmik uranimik akulinnik piasinnaanngillat.

Inatsisitigut inissisimaneq ersarissarniarlugu, uranimut inatsimmut innersuussinermik siunnersuummi ikkussisoqarsinnaavoq. aatsitassat qinngornernik ulorianartunik akullit inatsimmi matumani erseqqinnerusumik maleruagassiivigineqarnissaat tulluanngilaq, tassami aatsitassat qinngornernik ulorianartunik akullit maleruagassiivigineqarnerat uranimi inatsimmi maleruagassiivigineqareemat.

## **Apeqquut 2.**

**Ukiuni tallimani najugaqarnissamik akileraartarnissamillu piumasaqaat (§§ 5, imm. 3 aamma 13) aalajangersimasumik najugaqartutut taagorneqarnissamut: tamanna pillugu qanoq isumaliutersuuteqartoqarpa? Ukiunut qulinut sivitsuinissamut suut isumaliutigineqarsimappat??**

### **Akissut:**

Ukiut 5 najugaqarsimanissaq akileraartussaataasimanissarlu pillugit piumasaqaat politikikkut isumaliutersuuteqarnerit aallaavigalugit aalajangersarneqarpoq. Inuup nunatsinni isumalluutininuussutissarsiutigalugu atorluaasinnaalernissaanut, qanoq annertutigisumik nunamut atassuteqarsimanissat tassani apeqqutaavoq.

Ukiuni 5-ni atassuteqarsimanissaq pillugu piumasaqaat pingaarnertut isummersornerit marluk aallaavigalugit aalajangersarneqarpoq. Aappaa inatsisit akimorlugit, piumasaqaatit taamaattut naleqqussimappata, piumasaqaatit assigiissaartinneqarnissaannik kissaateqarnermik aallaaveqarpoq. Ukiuni 5-ni atassuteqarsimanissaq ataatsimoorluta isumalluutitsinnik atorluaanissamut piumasaqaatit inatsisissatut siunnersuutini arlalinni atornerarpoq, ilaatigut aalisarneq pillugu Inatsisartut inatsisaannut siunnersuummi (§ 9) kiisalu takornariartitsinermut akuersissuteqartarneq pillugu inatsisissami pisussami.

Ukiuni 5-ni najugaqarsimaneq akileraartussaataasimanerlu tamatuma saniatigut naleqqussorineqarpoq, tassami tamatumani ukiuni 2-ni atassuteqarsimanissamut piumasaqaatip maannakkut atuuttup sukannernerulersinneqarnerisa akornanni oqimaatigiissitsinissaq takutinneqarmat, sukaterineq killilersuivallaarnerutinagu.

Inuup aatsitassanik piasaalluni allartissinnaalernissaanut, ukiuni 10-ni najugaqarsimaneq akileraartussaataasimanerlu piumasarineqassappat, inuit tulluanngitsumik sivisoorujussuarmik inuussutissarsiummik ingerlataqarnissamik mattusimaneqartussaapput. Assersuutigalugu inummut aalajangersimasumik najugaqartumut katissimallugu aappaasoq nuuttoq, ukiuni arlaqartuni taama sivisutigisumik aatsitassanik piasinnaannginnissaa naleqqussorineqanngilaq.

Oqaatigineqassaaq, atassuteqarsimanermut piumasaqaatip saneqqunneqarnissaanut inatsimmi tunngavissaq inatsimmi ilanngunneqareemat. Taanna nunatsinni najugaqartunut, piffissami

ilinniagaqarnermik assigisaannilluunniit pissuteqartumik nunani allaniissimasunut, tunngatinneqarpoq.

### **Apeqqu 3.**

**Najukkani aatsitassanut inatsimmi suliaqarnernut Inatsisartut inatsisaat akuersissuteqartoqartinnagu, aningaasartalerlugu killiliussap aalajangerneranut tunngavigineqartoq siunnersuummut nalinginnaasumik oqaaseqaatini qupperneq 96-imi oqaatigineqaatigineqarpoq. Tulliuttut itisilerneqarnissaat ataatsimiititaliamit kissaatigineqarpoq:**

- **Saliisoqarsimatinnagu nunatta karsiata aningaasartuutunik matussusiisussangortussaana tunngavissarititaasup taassuma toqqarneqarneranut pissutaasut ilagigaat, Naalakkersuisut allapput. Paasissutissiisutigineqartut pillugit inatsisitigut suut tunngavigineqarnerisut Naalakkersuisunit ilisimatitsissutigineqarsinnaava?**
- **Sumiiffiup tikikkuminaannerunerani, assartuussinermut aningaasartuutit saliiinnermut aningaasartuutini sanilliussilluni annertunerpaasussaasut Naalakkersuisut allapput.**
- **Assartuussinermut aningaasartuutit qanoq annertutiginerat apeqqutaanani, Nunatta karsiata aningaasartuutai taamaaginnartussaasut Naalakkersuisut allapput.**

### **Akissut:**

Pisinnaatitsissummik pigisaqartoq nammineerluni saliisinnaangippat, saliiinnermut aningaasartuutit Nunap karsianut akilertinnissaannut inatsisitigut inatsimmi tunngavissaqanngilaq. Kisianni taamatut saliiinnermut aningaasartuutininut allanik akiliisussaqaanngimmat, tamanna saliisoqaannginneranik kinguneqaannartussaavoq.

Oqaatigineqarpoq matusinissamut aningaartuutissanut qularnaveeqqusiinissamik piunasaqarnissamut inatsimmi tunngavissaqartoq. Taamaattoq tassani pisinnaatitsissummik pigisaqartoq aningaasaqarnikkut nanertorneqartussaavoq, aammalu najukkani aatsitassarsiorluni suliaqarnikkut aallartitsinissaq pitsanngorsarneqassasoq kissaatigineqarmat, tamanna aallaaviatigut pisuni immikkut ittuni taamaallaat piunasaqaatigineqartassaaq.

250.000 koruuninik aningaasartaqartut ilaatigut annaasaqarsinnaaneq qanoq annertutigisoq Nunap karsianut pisussaaffigitilissallugu naapertuunnersoq pillugu isumaliutersuuteqarneq aallaavigalugu aalajangersarneqarpoq. Aningaasat ilaannit assartuussinermut aningaasartuutunik missingersuinissaq immikkut pingaartinneqarsimanngilaq, tassami ukkatarineqartoq tassaasimammam aningaasat tamakkiisut, pisinnaatitsissummik pigisaqartoq saliiinani pisoqartillugu Nunap karsianut nanertuisinnaasut.

Ilungersuutigineqarpoq suliaqarnikkut aalajangersimasumik annertussusillit pimoorussisullu, aatsitassanut tunngasunik suliaqarneq pillugu Inatsisartut inatsisaannit, suliaqarnikkut annertunerusunut maleruagassiinissamut naatsorsuutigineqartumit, aammalu pisinnaatitsissummik pigisaqartumut



annertunerusunik piumasqaateqarfiusartumit, maleruagassiivigineqalissasut. Taamaattoq tamanna suliassamik piginnittup iliuuseqarneratigut pisussaassaaq.

250.000 koruuninik killiliineq, aatsitassanut ikummatissanullu inatsit malillugu”annikitsumik aatsitassarsiorluni ingerlatassatut” taagorneqartussanut sanilliullugu, qaffasissumik aalajangersarneqarpoq, tassami innuttaasut annikitsumik aatsitassarsiorluni suliassanik ineriartortitsinissamut pitsaanerusunik periarfissinneqarnissaat kissaatigineqarmat.

Taamaattoq sumiiffinni assartuussinermut aningaasartuutit immikkut annertoorujussuusarfiini, 250.000 koruuninik saneqqunneqarsinnaanngitsumik killiliinerup, annikitsumik aatsitassarsiorluni suliassanik ajornakusuulersitsisinnaasoq, Naalakkersuisut paasilluarsinnaavaat.

Taamaattumik siunnersuummi § 5, imm. 2-p nutaamik oqaaseqatigiiliorneqarnissaa siunnersuutigineqarpoq, taamaalilluni assartuussinermut aningaasartuutit 250.000 koruunini ilanngunneqartassanatik:

*” Najukkani aatsitassanut tunngasunik suliaqarnerit paasineqassaaq ingerlatassat, allap matusinissamut pilersaarummik, takuuk § 25, piviusunngortitsineranut aningaasartuutissat missingersorneqartut, assartuussinermut aningaasartuutit ilanngunnagit, annerpaamik 250.000 koruuniullutik”*

#### **Apeqqu 4.**

**Annikitsumik aatsitassarsiorlunit ataatsimiititaliamut ilisimatitsissutigineqarpoq, pisinnaatitsissummik pigisaqarsinnaasut isumaqatigiissusiorfiginissaat siunertaralugu attaveqarfiginiartarneri ajornakusoortorujussuusoq. Pisinnaatitsissummik pigisaqartut piffissamik killilimmik saaffiginnissutinik akissuteqartarnissaat Naalakkersuisunit isumaliutigineqarsinnaava?**

#### **Akissut:**

Naalakkersuisut ajornartorsiut ilisimaaraat. Taamaattoq Naalakkersuisut naliliipput, pisinnaatitsissummik pigisaqartoq aalajangersimasumik najugaqartut, sumiiffimmi aatsitassarsiorluni misissuinissamut akuersissummi pineqartunut ilaasumi ingerlataqarnissamik kissaateqartut, saaffiginnissutaannik akissuteqarnissamut piffissamut killiliilluni pisussaaffilerneqarsinnaanngitsoq.

Taamatut aaqqissuussineq isumaqatigiissuteqarnissamut kiffaanngissuseqarnermik unioqquitsinerusussaavoq. Nammineerlutik suleqatigiittut, suleqataasup aappaata iliuuseqannginnerata malitsigisaanik isumaqatigiissuteqarnissaannik pinngitsaalisinnaanngilagut. Tamatuma saniatigut annikitsumik aatsitassarsiorluni suliaqarnerit pillugit inatsisip pisinnaatitsissummik pigisaqartut, aatsitassanut tunngasunik suliaqarnermut inatsit malillugu pisinnaatitsissummik pissarsisimasut, pisussaaffilernissaannut atoraanni, inatsisunik tamanna akuleriissitsinerusussaavoq. Pisinnaatitsissummik pigisaqartut taakkua pisinnaatitaaffii pisussaaffiilu aatsitassanut tunngasunik suliaqarnermut inatsimmi imaluunniit atugassarititaasut aatsitassanut

tunngasunik suliaqarnermut inatsit malillugu aalajangersagaasut malillugit, aalajangersarneqartariaqarput.

Isumaqatigiissutit aatsitassarsiorfiutileqatigiiffinnut isumaqatigiissutiginiarneqartut, aatsitassanut ikummatissanullu inatsisip ataani isumaqatigiissutiginiarneqarput, taanna malillugu isumaqatigiissuteqarnissamut kiffaanngissuseqarneq, allaganngorlugu akuersissuteqarnermi, ingerlatassat assigiit sumiiffiup akuersissuteqarfiusup iluaniittut, taamatullu avataaniittut, suliarineqarsinnaanerannut, killeqartinneqarpoq. Aatsitassanut tunngasunik suliaqarnermut inatsimmi isumaqatigiissuteqarnissamut periarfissaqarneq annertunerusoq atuutsinneqarpoq, taamaalillutik isumaqatigiissuteqartut namminneerlutik isumaqatigiissutit taakkunanilu atugassarititaasut annertussusissaat aalajangersarsinnaallutik. Tamatuma aalajangersimasumik najugaqartut pisinnaatitsissummik pigisaqartumut isumaqatigiissuteqarnissaat ajornannginnerulersittariaqarpaa. Pisinnaatitsissummik pigisaqartup isumaqatigiissut qanorpiaq kinguneqassanersoq, paasisimannilluinnassaaq. Assersuutigalugu ilitersuisoqarluni angalaarnernik aaqqissuussisartoq, aatsitassanik akuersissummi pineqartunut ilaasunik aalajangersimasumik annertussuilimmik katersisarnissaq pillugu pisinnaatitsissummik pigisaqartumut isumaqatigiissuteqarsinnaavoq.

Naalackersuisut siunnersuutigaat, maleruagassanik annertunerusunik atuutilersitsinissamut taarsiullugu, periarfissat nutaat pillugit illuatungeriit paasititsiniaavigalugit suliniuteqartoqassasoq.

Aatsitassanut tunngasunik suliaqarnermut inatsit malillugu pisinnaatitsissummik pigisaqartunut attaveqarniarnermut tunngatillugu oqaatigineqarpoq, Aatsitassanut Ikummatissanullu Aqutsisoqarfik attaveqarfissanut paasisutissanik ingerlatitseqqiinermik ikiuukkumasooq. Tamanna ataatsimiinnerni inatsisissatut siunnersuutip piareersarneqarneranut atatillugu ingerlanneqartuni annikitsumik aatsitassarsiornissamut pisinnaatitsissummik pigisaqartunut oqariartuutigineqartareerpoq.

Tassungarpiaq tunngatillugu qinnuteqarnermi immersugassaq Aatsitassanut Ikummatissanullu Aqutsisoqarfiup naatsorsuutigaa aaqqissussallugu, taamaalillutik pisinnaatitsissummik pigisaqartut siunissami attaveqarfissanut paasisutissat, Aatsitassanut Ikummatissanullu Aqutsisoqarfiup aalajangersimasumik najugaqartut saaffiginninneranni ingerlateqqissinnaasai, paasisutissiissutigisussaallugit.

#### **Apeqquut 5.**

**Aatsitassanik annertuumik nalilinnik nassaartoqarnerani nalunaarsuisoqarnissaa pillugu qanoq isumaliutersuuteqartoqarpa?**

#### **Akissut:**

Inatsisit atuuttut malillugit aatsitassat immikkut nalituut arlallit, kaaviiartinneqalinnginneranni, oqartussanit nalilersorneqartussaapput.

Taamatut aaqqissuussineq inunnit annikitsumik aatsitassarsiornermi avatangiisiniittunit annertuumik isornartorsiorneqarpoq, aammalu innuttaasut aaqqissuussinermi kalluarneqartut kissaatigisaasa akuerinissaannik kissaateqarsimaneq, aaqqissuussinerup siunnersuummi matumani atorunnaarsinneqarneranut pingaarnertut pissutaavoq. Taamaattumik Naalackersuisut siunnersuutigaat nalunaarsuisarneq piumasaaqatigineqassanngitsoq.

Nalunaarsuinngikkaanni nunap sannaanik nunap assiliornissamut paasissutissat ilai pinngitsoorneqarsinnaapput. Naalackersuisut qarasaasiatigut paasissutissaasiviliuleruttorput, tassani ujaqqanik pinnersaasiassanik peqarfinnut ilisimaneqartunut nunap assiliortoqarluni. Taamaattoq naatsorsuutigineqarpoq qarasaasiatigut paasissutissaasiveqarneq apeqqutaatinnagu, nalilinnik peqarfiit amerlanersai suli Naalackersuisut ilisimalertassagaat, tassami aalajangersimasumik najugaqartut, nalilinnik peqarfinnik nassaartut, peqarfimmut pisinnaatitaanissamik qulakkeerinninniarlutik kisermaassisussaataalluni annikitsumik aatsitassarsiornissamut akuersisummik qinnuteqartartussaammata.

Aatsitassanut tunngasunik suliaqarnermit isertitanik nalilersuinissaq siunertaralugu nalunaarsuisarnermut tunngatillugu, aatsitassat akuersisummik peqarani aalajangersimasumik najugaqartunit piiarneqartut nalunaarsorneqartarnissaat, namminersornermut inatsit malillugu piumasaaqaataannngilaq, tassami isertitat taakku danskit naalagaaffiannut tunngatillugu aatsitassarsiornermut naatsorsuutini ilaatinneqanngimmata.

Aammalu isertitat taakku akileraaruserneqartarnerannut tunngatillugu, tamanna innuttaasup aamma Akileraartarnermut Aqutsisoqarfiup akornanni suliassaasussaavoq. Suliassaqarfimmi tassani, inuussutissarsiorfiusunut allanut sanilliullugu, pissusissamisuunngitsut amerlanerunissaasa upperinissaanut pissutissaqanngilaq.

Ajornartorsiuutinik takkuitsuuisoqarsimappat imaluunniit annertunerusunik isumaliutersuuteqarnissaq pisariaqarpat, Naalackersuisut apeqqut pillugu ataatsimiititaliap isumaliutersuutai tusaarusuppaat.

**Apeqqut 6.**  
**Aasitassanik annissuisoqarnissaanik nakkutilliisoqarnissaa qanoq isumaliutersuutigineqarpa?**

**Akissut:**

Siunnersuummi annertunerusunik nakkutiginninnissamik atuutilersitsisoqanngilaq, aatsitassanik annissineranut nakkutiginninneq suli ilanngaaserineranut oqartussanit isumagineqartussaavoq. Aaqqissuussineq taanna maannamut naammattumik sunniuteqarluortoq paasinarsisimavoq, takornariat nunatsinniit aallarneranni aatsitassanik akuttunngitsumik arsaarinnittoqartarpoq.

**Apeqqut 7.**



**Qanoq ilillutik ilisimatusartut aatsitassanik katersineq, piiaaneq annissinerlu ilisimatusarneq siunertaralugu uppersartassavaat? “Ilisimatusarnikkut siunertaqarneranik” isigineqalernissanut qanoq piunasaqaateqartoqarpa?**

**Akissut:**

Aatsitassat ilisimatuussutsimik siunertalimmik katersorneqartut, uppersarneqarsinnaanera piunasaqaatigineqartussaavoq. Tassa imaappoq, ilisimatusarfittut ittumut atassuteqartussaapput aammalu ilisimatuussutsikkut suliniummut suliasamat nassuiaateqartussaallutik.

Kisianni ataatsimiititaliaq naliliippat, aqqissuussinermi tassani saneqqutaarinissap aarlerinaateqarnera annertuallaartoq, siunnersuummi § 9, imm. 4-mi ilaatitsinnginneq peerneqarsinnaavoq, taamaalilluni pisuni tamaginni avammut annissinissamut akuersissuteqarnissaq piunasaqaatigineqalissalluni.

**Apeqqu 8.**

**Nunani tamalaani malitassat periutsillu pitsaasut inatsisissatut siunnersuusionermi suut tunngavigineqarpat?**

**Akissut:**

Siunnersuummi nunatsinni nammineq misilittakkat, 1. januar 2010 akisussaaffigilerlugu tigusinissaq sioqqullugu tamatumalu kingorna suliasaqarfimmi allaffissornikkut inerisarneqartut, tunngavigineqarnerupput. Aatsitassanut ikummatissanullu inatsisip aggulunneqarnerani maleruagassanik atuuttunik nutarterineq taanna iluatsillugu toqqaannartumik ingerlanneqarpoq. Tassunga atatillugu misilittakkat inuussutissarsiortut misilittagarilersimasaat aamma tusarnaarneqarput.

Naalakkersuisut inatsisinik piareersaalluni suliaqarnermi nunani allani inatsisit qiviarsimavaat, kisianni nunat allat annikitsumik aatsitassarsiorluni ingerlataqarfiusartut, Kalaallit Nunaannut sanilliunneqarsinnaanngillat.

Taamaattoq aalajangersimasunik ajornartorsiutitaqarpoq, ilaatigut isumannaallisaanermut tunngatillugu, aamma nunatsinni maani atuuttunik, tamannalu aamma suliffissuit tusarniaanermut akissutaanni tikkuarneqarpoq. Tamannalu killiliinernik siunnersuummi atuutilersinneqartunik kinguneqarpoq, ilanngullugit tamatumunnga akuersissummik peqarani ingerlatassat, atortunut tigummiaannartakkanut killilerneqarnerat, aammalu sullut isaariaannik itersalianillu annerpaamik 1 meterinik pilersitsisoqaqqusaasoq.

**Apeqqu 9.**

**Ima; “naleqquttumik aammalu pissutsini taamaaqataanni nunani tamalaani suleriaatsinut pitsaasunut naapertuuttumik” piunasaqarnissami isumaliutit. (§1, imm. 2).**

**Akissut:**

Nunani tamalaani suleriaaseq pitsaasoq akuerisaasoq taaguutaavoq allanngorartinneqarsinnaasoq, ineriartortuaannartoq. Oqaasertaliineq ineriartornermut malinnaasinnaanitsinnut qularnaarisuuvoq.

Taaguutitut ineriartortuaannartunut assersuut, tassaasinnaavoq ESG-imut (Environment, Social og Governance), inuiaqatigiinnut eqqaminniittunut isummersortuaannartussaannermut, malitassaq.

”Pissutsini taamaaqataanni” suleriaaseqarnissamut tunngatillugu, siunnersuummi annikinnerusunik ingerlataqarnerit maleruagassiivigineqarnerat isiginiarneqartariaqarpoq. Taamaattumik malitassat suleriaatsillu aatsitassarsiormik suliffissuaqarnerup iluani atuuttut, toqqaannartumik nuutinneqartussaangillat, taamatullu malitassarpasuit suleriaasissarpasuilu issittumi silap pissusaani ingerlatassanik suliaqarnermut sillimanniffiunatik.

#### **Apeqput 10.**

**Bluejay Mining Plc.s tusarniaanermut akissuteqaammimi apeqputinik arlalinnik saqqummiussivoq Naalakkersuisunit akineqarsorinangitsunik. Naalakkersuisut tamatumunnga oqaaseqaateqarnissaat ataatsimiititaliamit kissaatigineqarpoq.**

#### **Akissut:**

Bluejay Mining Plc-ip apeqputaani pineqarpoq misissuinerit suut Naalakkersuisut inatsisunik piareersaallutik suliaqarnerminnut atatillugu suliarisimaneraat, aammalu misissuinerit taakku qanoq sukumiitigisimanersut.

Naalakkersuisut isumaqarput naammattunik misissuisoqarsimasoq.

Nalilersuinerit siunnersuummut tunngavigineqartut pingaartumik ilisimasanik Naalakkersuisoqarfimmi inerisarneqartunik aammalu misissuinerinik pigineqareersunik pingaartumik aallaaveqarput. Najoqqutassat pigineqartut naleqquttunik nalilersuinissamut naammattut isigineqarmata, suleqatigisanit avataaneersunit nalunaarusianik akisuunik, immikkuullarissunik siunnersuutip sunniutissaannik misissueqqissaartunik, piniarnissaq Naalakkersuisut pisariaqartissimangilaat.

Oqaatigineqarpoq apeqputit siunnersuutip ataasiakkaatigut imarisaannut tunngassuteqanngimmata, taamaattumillu aallaaviatigut tusarniaanermut allakkiami sammineqarnissaa piumasqaataanani.

Inussiarnersumik inuulluaqqusillunga

Med venlig hilsen

Best Regards



Naaja H. Nathanielsen